

# Violashon i Pornografia

E tabata un krímen horíbel! Kuater hòMBER a viola un dama stranhero bibando na nos isla. Hopi hende a keda preokupá. Nos komunidat ta preokupá, pasobra polis tabata inalkansabel. Nos gurunan finansiero ta preokupá ku e krímen lo afektá nos ekonomia, turismo en partikular. Damanan ta preokupá ku nan por ta e siguiente víktima.

Un preokupashon ku nos no a tende ekspresá ta pa ku un pusíbel kousa di un akto sin bèrguensa. Nos no sa ken a kometé e krímen i pues nos no por sa sigur e motibu. Ma ta un echu bon dokumentá ku **pornografia ta rais di hopi violashon.**

Antes e palabra “pornografia” a referí na revista, plachi, òf pelikula di hende muhé tòples òf sunú. E interes di un hòben pa mira pòrtrèt di hende muhé sunú a proba ku e ta hòMBER!

Ma si nos ta kere ku e pornografia di ayera tin e mésun definishon awe, nos ta malamente kiboká. Pornografia awendia ta grosero, horroso. Masokismo i sadismo ta teman regular. Ta torturá, suta, mara, violá hende muhé. Tin grupo lèsbian, homoseksual òf heteroseksual den akshon. Adul-tonan di ambos sekso ta tene relashon seksual ku muchanan di asta tres aña di edat. Un tata ta “gosa” sèks ku su yu muhé, un mama méskos ku su yu hòMBER, ruman ku ruman, mucha ku mucha, hende ku bestia. Hende ta uriná riba otro ta smer otro ku nan sushi. Aktonan ku Dios ta kondená (Levítiko 20:10-21)

Beibel ta bisa “...segun e imagen di Dios El a krea hende; hòMBER i muhé El a krea nan” (Génesis 1:27). Ma pornografia ta roba tur dignidat di e sekso femenino. Konstant pornografia ta duna impreshon ku hende muhé ta hambrá pa sèks; ku ora e ta nenga hasi sèks, loke e ta deseá di bèrdat ta pa e hòMBER fors’é, viol’é! E muhé ta bringa, ma e ta gusta. **Bo mama, esposa, òf yu muhé por ta e siguiente víktima di e adikto di pornografia ku ta kere e mentira kruel ei!** Di bèrdat, violashon ta kousa heridanan emoshonal ku ta dura añanan pa kura. **Klaramente, pornografia ta responsabel pa un krímen tras di otro**

Sikólogo Victor Cline di Universidat di Salt Lake City a trata shenes di hende ku a kometé asalto seksual. El a deskubrí ku kasi tur ta sigui e mésun kuater paso: 1) E hòMBER ta bira adikto di pornografia. 2) Pa sasia su deseo kresiente pa stimulashon seksual, e ta buska pornografia mas sadista i grosero. 3) Ku un “dieta” konstant di pornografia asina, e ta bira ménos sensíbel ku tempu. Loke antes a dun’é desgusto, awor e ta hustifiká komo normal i aseptabel. 4) E ta kuminsá hasi loke e ta mira i lesa den e pornografia.

Polis di estado di Michigan (Merka) a studia 38.000 kaso di asalto seksual. Nan a deskubrí ku 41% di e malechornan a usa pornografia nèt promé ku nan akto degenerá.

Dr. William Marshall su estudio pa Departamentu di Hustisia di Canada a haña ku kasi mitar di e violadónan a usa pornografia promé ku nan a buska un víktima pa violá. Un porsentahe grandí a atmití ku nan tabata kopia e esenanan pornográfiko ora nan a kometé e krímen. Un Komishon pa ku Pornografia na Merka a konkluí ku “kontakto ku pornografia ta e pronostikadó mas sigur di pervershon seksual.”

Loke nos ta trese dilanti ta mahós i spantoso! Ora hende ta kuminsá sasia nan appetit seksual ku video, pelikula, internet, revista, èts. eksplisito degenerá, e chèns ta grandí ku nan por bira adikto di pornografia i deseá mas i mas! I tambe tin e chèns ku e lo ke hasi loke e ta mira.

Mi ta roga tur esnan ku ta bende, hür, imprimí, òf transmití pelikula, literatura, òf video pornográfiko pa habri wowo pa bo kontribushon na e degenerashon moral di nos komunidat. Sin duda, bo ta sikiera parsialmente responsabel pa kualke krimen—manera violashon—kometé bou influensia di pornografia!